

Pedru kute memã pi'ôk kumrëx no'ôk ne ja.

Jejukôt ba djwýnhbê Pedru ne mebê idjaer kute amim Jeju marjamã pi'ôk no'ôk ne. Ar ja ne ar apýnh pykakôt ajmã nhym me Jejukôt aro ajkê ne. Nhym kam Pedru kute aro týx ne o kïnhmã arkum pi'ôk no'ôk ne. Ne arkum,

—Mrãmri ne gwaj pykajabê babari Jejukôt batokry. Te batokry gwaj Jeju'ã bangrà týx. Arým gwaj baktêp gwaj bakïnh djã dji. Gwaj Jeju'ã amijakren kudjwa te batokryn tu amikajmãtã Jeju kamnhïx ne bakïnh. Nãm ã Pedru arkum ane.

¹ Ibê Pedru. Jeju Kritu ne ijano ba memã 'ã idjujarënh ar iba. Ba ne ba pi'ôk no'ôkkam ar amã ikabën jarë. Amrêbê gar apýnh me õ pykakôt aben bê abingrãnhja nhym me kute ar ajo me bajtemo baja ba ar amã ikabën. Pykabê Põtukam, Garaxakam Kapadôkam, Adjïkam, Bixinïkam, ar aben bê abingrãnhja, ba ar amã ikabën jarë.

² Metïndjwýnh, me Babãm djwýnh arým amijo ar apytã. Amrêbê: mýjja kunï kator kêttri amijo ar apytã. Kute prïne amikukãm mýjja kunï markam amijo ar apytã. Karõ ne ar ajo mexo ba gar arým kôt amextiren ajmã akute kêt ne ar aba. Ne kam katãt Jeju Kritu kabën man kôt ar amijo aba. Amrêbê: ne me bakukãmãre mry kamrôo me kaprêk nhym Metïndjwýnh arým me axwe maro aknon mekam ngryk kêt ne. Jakamdjwý arým Kritu pïte'ykam ty nhym kamrô prôt. Kam ne Metïndjwýnh arým ar ajaxwe maro aknon ar akam ngryk kêt.

Gê tu kum ar akaprî:kumrêx* gar adjumar mexo amũ amikamên arÿm adjumar mexkumrêx ne.

Mÿj ne me kute amiwÿr kamnhĩxmã?

Rô 8.29; Ep 1.4; A Xim 1.9; Ped k 2.9

³ Ba Metĩndjwÿnhmã mextire jarê. Metĩndjwÿnh ne ra:xkumrêx. Kubê Běnjadjwÿr djwÿnhbê Jezu Kritu Bãm. Ta ne ukaprĩ ra:xi. Ukaprĩ raxkôt ne arÿm gwaj bamã amak bô. Ga, me nã kurũm apôxkam me umar djà nyja pumũ. Metĩndjwÿnhdjwÿ ne gwaj bajamak bô gwaj arÿm badjumar djà nyn kam bamã katât amijo baba prã:m ne bamã Metĩndjwÿnh kĩ:nhkumrêx. Jezu Kritu tyk ne akubyn tĩnkam ne arÿm gwaj bamã bajamak bô gwaj arÿm badjumar djà ny. Kute gwaj bamã bajamak bônhkam gwaj tu 'ÿr babôxmã kamnhĩxkumrêx. Dja gwaj 'ÿr bôx ne kôt ar baba rã'ã: rã'ã ne. ⁴ Nhykam arÿm gwaj bamã mÿjja mexti:re ngã, gwaj bamã mÿjja kume:x ngã. Djãm mÿjja rerekmã? Kati. Djãm punumã? Kati. Mÿjja mex rã'ã: rã'ã ne. Kàjkwa djwÿnhkam ne arÿm ar amã kudji.

⁵ 'Itÿxo Metĩndjwÿnh kute mã amim ar apytàr mex ne ar ajo ba. Gar tu amim markumrêx nhykam kute mã 'itÿxo ar apytàr mex ne ar ajo ba. Dja mã amim ar ajo ba: nhykam me kute aminhinomã amimên djà nhõ akati arÿm bôx. Bôx nhykam arÿm prĩne amimex kôt ar ajo mexkumrêx.

⁶ Jakam godja gar apÿnh mÿjjakam akaprĩ jabej. Me kum ar akurê nàr akanê nàr anhõbikwa'õ abê tyk nàr mÿjja 'õdjwÿkam akaprĩ jabej. On dja akaprĩ kêt ne. Dja te akaprĩn akĩnhti:re. Mÿkam? Bir, dja gar Metĩndjwÿnhkôt amexi:rekumrêx. Ja ne gar amiwÿr kam ama. Kam ne gar akĩnhti:re. Akaprĩ japôkmã akĩnhti:re.

* 1:2 Djãm ar ga ne gar adjukaprĩ nhykam pãnh arÿm kum ar akaprĩ Kati. Ta ne tu kum ar akaprĩkumrêx.

⁷ Ga, kên karyrkam punu kunĩ kator kadjy me kute kuwykam adjwyrja pumũ. Nhym kam arým mexkumrêx. Ar gadjwý dja me kum ar akurê nàr akanê nàr anhōbikwa'ō abê tyk nàr mýjja 'ōdjwýkam akaprĩ jabej. Kam dja gar amim Metĩndjwýnh man amim maro amũ amikamên arým mar rax ne. Aje Metĩndjwýnh mar raxkam akĩnhkumrêx. Kam akĩho kên karyrkam me kĩnhja jakrenh me:x ne. Kên karyr dja on akuno. Nhym be, ar ga dja gar tu amim Jeju Kritu mar raxkumrêx nhym akubyn bōx ne apumũn ar ajã amim,

—Be, inhō me wã mex djô'ã ne me mã imex jarên irax jarē ba kam arým ikĩnhkumrêx, ane. Dja ã ar amex djô'ã ane.

⁸ Ar ga ne gar omũnh kêt. Te aje omũnh kêt ne amã abê:kumrêx. Te jakam aje omũnh kêt ne aje tu amim markumrêxkam arým akĩ:nhkumrêx ne te: aje akĩnh'ã memã amijarênh mex prãmje. ⁹ Metĩndjwýnh kute ar apytãrmã gar tu amim Kritu markumrêx nhym arým ar apytã gar kam arým akĩ:nhkumrêx.

¹⁰ Djãm amrêbê: ne Metĩndjwýnh kukwakam kabên jarênh djwýnh kute gwaj bapytãr mar? Mýjjao Metĩndjwýnh kute gwaj bapytãrmã djãm me kute mar? Kati. Nãm me memã kum,

—Metĩndjwýnh ta dja ĩ tu kum me kaprĩkumrêx, anhỹro ba. Jabit ne me arē. Ne kam te: kute amikukãm gwaj bapytãr mar mex prãmje. Nãm me te: kute marmã prĩne pi'ōkkôt abenã Metĩndjwýnh kabên jarên abenmã kum,

¹¹ —Je tō, mýj xêja ne Metĩndjwýnh ta tu mekam ukaprĩkumrêx? Mýj dja me utãr on? Nhýnh amex jakam dja ã meo ane? Nãm me ã amim ane. Nhym Kritu Karō me kadjwýnhbê amijo kajkep ne memã Kritu'ã ajarē. Nãm memã kum,

—Dja tokryn kam ĩ arÿm raxkumrêx. Nãm ã Karõ memã ane nhym me te: kute amikukãm gwaj bapytàr mar mex prãmje. Mÿjjao kute gwaj bapytàr ja te kute mar mex prãmje.

¹² Nhym kam Metĩndjwÿnh arÿm memã kum,

—Djãm me ajã ne ba ikabên ja jarê ga me te: aje mar mexmã? Kati. Tũ:mràm me akamingrãnyre'ã ne ba ikabên jarê, ane. Metĩndjwÿnh memã ane nhym kam 'ãtũmkam ujarênh djwÿnh ar arÿm kàj bê ar amã Kritu'ã ujarênh ny jarê. Kute kàjkwa kurũm memã Metĩndjwÿnh Karõ janorkôt me ar amã arê gar gajbit arÿm ama. Kadjy mrãnh djwÿnhdjwÿ te kute mar prãmje gar gajbit arÿm ama.

Me mexti:ren axwe kêt ne ar ba'ã kute memã karõ.

Ep 4.1; Kor 1.10; Tex k 2.10; Xit 2.14

¹³ Ar aje markam dja gar ano tÿx ne ajamak mex ne ajaxwe kêt kadjy amijãno djan mrãmri akĩnh djakam amakkumrêx. Kwãrĩk wãnh kam amak katëri 'ã adjukanga kêt. Dja Jeju Kritu bõx ne arÿm memã amijo amirĩt ne arÿm ar amã akĩnh djã nhõrkumrêx. ¹⁴ Ga, me prĩre kute nã kabên mar ne kôt kute amijo baja pumũ. Ar gadjwÿ dja gar Metĩndjwÿnh kabên man kôt ar amijo aba. Amrêbê ne gar ajamakkre kêt ne amã mÿjja punu kĩnh. Kwãrĩk wãnh akubyn amã kĩnh kêt. ¹⁵ Metĩndjwÿnh ne mexti:ren axwe kêtumrêx. Ar ga dja gar Metĩndjwÿnhkôt amextiren ajaxwe kêt ne ar aba. Amrãnh kunikôt ajmã akute kêt ne ar aba. Metĩndjwÿnh ta ne amiwÿr ar ajuw ne ar ajo ba. ¹⁶ Amrêbê: ne me bakukãmãremã kum,

“Ba ne ba imexti:ren ijaxwe kêtumrêx ne ar iba.

Dja gar ikudjwa amextiren ajaxwe kêt ne ar aba.”

Nãm ã me bakukãmãremã ane nhym me arÿm 'ã pi'òk no'òk. Kam dja gar amexti:ren ajaxwe kêt ne ar aba.

¹⁷ Kàjkwakam me Babãm djwÿnhmã ne gar amijo a'uw. Ta ne kute me kunĩ axwe markam kute memã axwe pãnh jarênh. Me kute axwekôt amijo badjari 'ãnh dja memã pãnh jarênh. Dja katàt me kunĩmã pãnh jarê. Ar gadjwÿ kute ar amã ajaxwe pãnh jarênh karô amijãno djan ar aba. Ga, me me bajtem nhõ pykakam ar bakam amijãno ãm ne katàt kute amijo baja pumũ. Ar gadjwÿ pykakam ar abari amã Metĩndjwÿnh pyman amijãno dja. Ajaxwe kêt kadjy amijãno djan katàt ar amijo aba.

¹⁸ Amrêbê ne gar te ajaxwe kêt mã ar akukãmãkjê kukràdjà kôt amijo aba kajgo:n ajaxwe rã'ã. Nhym kam Kritu arÿm ar ajaxweo pãnh nhym kam Metĩndjwÿnh arÿm tu ar amã axwe kêt jarê gar kum ajaxwe kêt. Djãm kryt jakao nãr kên karÿro ne ar ajaxweo pãnh? Kati.

¹⁹ Metĩndjwÿnh ne kum kra kĩ:nh. Nãm te kum kĩnh ne arÿm pykamã ano nhym arÿm amikamrôo ar ajaxweo pãnh. Ga, me bakukãmãre kute mrykĩ'ãtomti par ne kute Metĩndjwÿnhmã bôrja pumũ. Mry punu kêt ne prĩne kà mex ne me kupa. Kritudjwÿ ajmã kute kêt ne axwe kêt kumrêx ne arÿm ar ajaxweo pãnh. Pĩte'ykam ne kamrô prôt ne arÿm tyn kam arÿm o ar ajaxweo pãnh. Kam dja gar amijãno djan katàt ar amijo aba.

²⁰ Mrãmri ne Metĩndjwÿnh amim Kritu'ã karôkumrêx. Amim tyk'ã karôkumrêx. Pykamẽ kàjkwamẽ mÿjja kunĩ kêttri ne amim 'ã karôkumrêx. Ne kam 'ãtũmkam arÿm ar akadjy Krituo amirĩt ne. Mÿjja kunĩ kute aminhinomã amimênh djã nhõ akati jakam arÿm o amirĩt ne. ²¹ Nãm ar akadjy o amirĩt gar aje kôt tu amim Metĩndjwÿnh markumrêx. Nãm o amirĩt nhym ty nhym akubyn o tĩn ne amiraxo o rax nhym arÿm ra:x ne uma:kumrêx. Mÿj kadjy? Bir, gar aje tu amim Metĩndjwÿnh markumrêx ne aje amiwÿr kôt atĩn kamnhĩxmã. Ja kadjy ne akubyn Krituo tĩn nhym arÿm ra:xkumrêx.

²² Jakam ne gar arÿm kabên katàt man kôt ar amijo aban arÿm ajmã akute kêt ne ar aban arÿm mrãmri amã me abê katàtkumrêx. Jeju kukwakam me bakamyja amã me abê katàtkumrêx. Kam, dja gar ã anen amim ajaxwe'ô'ã karô kêtikumrêx ne arÿm ar amã aben jabê:

²³ Ga, te bãygogo 'y mex ne punu prãmja pumũ. Nhyim me bãygogo 'y mex kre nhyim arÿm ingrôtja pumũ. Ar gadjwÿ ne me ar amã Metĩndjwÿnh kabên jarê, Metĩndjwÿnh kabên kute mÿjja 'y pyrãk ne me ar amã arê. Nhyim me kute ar amã arênhja ne kute me àkre pyrãk. Djãm Metĩndjwÿnh kabên punu prãm? Kati. Mex rã'ã: rã'ã. Tãm ne me ar amã arê gar aman arÿm tu amim Metĩndjwÿnh markumrêx. Nã gãm ar mÿjja nhingrôt mãn prabê tu amim markumrêx. Nhyim kam arÿm ar amã ajamak bô gar arÿm adjumar djà ny kute mrãmri ne me prĩre bixadjwÿr nykam umar djà ny pyrãk. Ne kam arÿm amã Metĩndjwÿnh kĩ:nh ne aje mar prã:m ne aje katàt amijo aba prã:m ne. Metĩndjwÿnh ne amikabên pÿnh ne arê. Djãm kute atemã kabên 'ô jarênhmã ne kute o kabên tũm japanh ne o biknormã? Arkati. Kute amikabêno biknor kêtikumrêx. ²⁴ Ikabênja kôt ne me amrêbê: me bakukãmãremã kabên jarên memã kum,

“Ga, bõja pumũ. Bõ tĩn 'ikrãne ne arÿm mjô. Me badjwÿ ne gu me bakunĩ batĩn ne ar baba 'ikrãne.

Ga, pidjôrã mexkumrêxja pumũ. Pidjôrã mex 'ikrãne ne arÿm rôrôk ne. Me badjwÿ ne gu me bamex 'ikrãne.

²⁵ Nhyim be, Metĩndjwÿnh ne amikabên pÿnh ne arê. Djãm kute iby atemã kabên 'ô jarênh ne kute o kabên tũm japanh ne o biknormã? Arkati. Kute mar tÿx

rã'ã: rã'ã ne.”†

Nãm me ã me bakukãmãremã ane. Kam ne gwaj kabên mar pÿnh. Amrêbê ne me kàj bê ar amã Kritu'ã ujarênh ny jarê. Kabên pydjin arê gar mar pydji.

2

¹ Me kute ar amã Kritu'ã ujarênh ny jarênh ar aje mar pydjikam

on wãnh me kãxã akabên punu kanga.

Aje memã ajêxkôt me noo abiknor on wãnh kanga.

On wãnh ajêx ne aje amijo Jeju mar mexja kanga.

Me'õ nhõ mÿjja'ã angryk on wãnh kanga.

Akabên punu kunĩ on wãnh kanga.

² Metĩndjwÿnh kabên kute me kã kangô pyrãk dja ga amã kĩnh. Aje me prĩre rwÿk ny pyrãk kute kum kã djãnh pyrãk ã amã kabên kĩho ane. Ne kabên maro tẽ:n maro amũ amikamên mar ra:x ne. ³ Aje arÿm amim Bẽnjadjwÿr djwÿnh mex kakinhkam dja ga ã amã kabên kĩho ane.

Kute Kritu'ã kên jakre.

⁴ Kritu ne kute kên pyrãk. Nhym be, kên ne tĩn ne ar ba kêt. Nhym be, Kritubit ne tĩn ne ar ba. Kute kên pyrãk gar arÿm 'ÿr bõx. Nhym me kwÿ arÿm kanga. Nhym be, Metĩndjwÿnh ta arÿm amijo utã. Kute o me utãr kadjy arÿm amijo utã. Kum kĩ:nhkumrêx kute mrãmri ne me kum kên pãnh rax kĩnh pyrãk.

⁵ Ar gadjwÿ ne gar aje apÿnh kên pyrãk. Nhym be, kên ne tĩn ne ar ba kêt. Ar gajbit ne gar atĩn ne ar aba. Aje apÿnh kên pyrãk. Ga, me bakukãmãre kute kẽno Metĩndjwÿnh nhõ kikreti nhipêxja pumũ. Ar gadjwÿ ne Metĩndjwÿnh arÿm ar ajo kran ar amã Karõ jano

† 1:25 Kute amikabên jarênh ne o biknor kêtumrêx. Kute apÿnh mÿjja jarênh kôt dja mÿjja kunĩ apõx mexkumrêx.

nhym kam arÿm ar akam nhÿn ar ajo ba. Gar kam arÿm abeno anhôbikwa mexo mõi. Nãm ar ajo kute mrãmri ne këno kikreti nhipêxo mõi pyræk. Ne kam ajte amim ar apumjuw, kute ar ajo me kadjy Metĩndjwÿnh mar djwÿnhmã ne ar apumjuw. Ga, me kadjy Metĩndjwÿnh mar djwÿnh kute Metĩndjwÿnh nhõ kikretikam kum mry bõr nhym kum kĩnhja pumũ.

Ar gadjwÿ Karõ kute ar ajo bakam ne gar kum apÿnh kĩnh djà nhõro aba nhym kum kĩnh. Ar aje tu amim Jeju Kritu markam ne kum kĩnh. ⁶Be, nhym kam Metĩndjwÿnh kën'ã Kritu jakre. Kën pãnh raxja, me kum kĩnhja'ã ne akren me bakukãmãremã kum,

“Ota ba krĩraxbê Xijãokam këno kikremo kajpa nhym dja. Kën mexkumrêx, kën pãnh rax ne ba amijo utàn kudja.

Me kute tu amim kënja markumrêx dja me pijàm kadjy kêtikumrêx.”

Nãm Metĩndjwÿnh ã Kritu'ã me bakukãmãremã ane nhym me arÿm 'ã pi'ók no'ók ne. ⁷Ar ga ne gar arÿm tu amim Kritu markumrêx ne arÿm amã kĩ:nh. Amã kĩnh kute mrãmri ne me kum kën pãnh rax kĩ:nh pyræk.

Nhym be, me amakkre kêtja ne me kute amim Kritu mar kêt ne kanga. Nhym be, Metĩndjwÿnh ta arÿm kàjmã kum rax kamẽ nhym arÿm ra:x. Kritu'ã ne amrêbê me bakukãmãre memã ajarẽ. Nãm me memã kum,

“E kum kën ja ne me kute kikreo ãm djwÿnhja kute kikremã armã te omün kam bõm kumẽ.

Kën ja ne arÿm kute kikremo kajpar, kum kajpar tÿxi”, ane.

Be ga, me bakukãmãre kute amrêbê: memã anhÿr kõt me arÿm kute Kritu kangaja pumũ. Nhym kam Metĩndjwÿnh arÿm kàjmã kum rax kamẽ nhym arÿm ra:x ne. ⁸Nãm me memã kum,

“Kën ne kute me par tok nhym kam me rôrôk prämkuurëx”, ane.

Me amakkre kêt ne me kute me rôrôkja pyræk. Nãm me kute amim Kritu mar kêt ne kam arým me biknor tokry djækam akuno. Metĩndjwýnh kute amrëbê: me'ã amim karõ kôt dja me arým akuno.

⁹ Nhym be, ar ga ne Metĩndjwýnh arým amijo ar apytà. Ar ga ne gar aje mrãmri ne me kady Metĩndjwýnh mar djwýnh rúnh pyræk. Nhym Bënjadjwýr djwýnh ne ar ajo ba. Ar abê Metĩndjwýnh nhõ me wýnhkuurëx nhym arým amim ar ajo ba. Ar gajbit ne amim ar ajo ba. Amrëbê ne gar ajaxwe: ne aje mrãmri ne me akamàt kô tykkam rôrôk baja pyræk. Gar ari ajaxweo aba nhym Metĩndjwýnh arým amiwýr ar ajuw ne ar ajo ba. Jakam ar aje mrãmri ne me irækam katàt ba pyræk ne katàt Metĩndjwýnh kôt ar amijo aba. Ne kam arým memã ra:xmẽ mextire 'ã adjujarënh ar aba. ¹⁰ Amrëbê ne gar ate me kajgo kôt ar aba. Nhym Metĩndjwýnh arým jakam ar ajo kran amikôt ar ajo ba. Amrëbê ne kum ar akapri kêt. Ne kam arým jakam kum ar akapri.

¹¹ Ga, me me bajtem nhõ pykakam ar baja pumũ. Djãm me kute amikukràdjà kangan me bajtem kukràdjà marn kôt amijo ba prãm? Kati. Ar gadjwý ne gar me kum Metĩndjwýnh kĩnh kêtja mẽ ro'ã ar aba. Me kum amidjwýnhbito kĩnh prämkuurëx axwe:. Me axwe kôt ar ajaxwe puma:. Djãm ar aje Metĩndjwýnh kukràdjà kangan me axwe kukràdjà 'amýnh ne kôt ajaxwemã? Kati. Kwãrik wãnh. Dja gar Metĩndjwýnhmã amijangri týt.

¹² Me kute Metĩndjwýnh mar kêtjamẽ ro'ã ar abakam dja gar katàt ar amijo aba. Nhym kam me ar apumũn arým ar ajã 'êx jabej ne arík ar ajã kute,

—Ga, me axweja pumũ, anhýr jabej. Kwãrik wãnh rã'ã. Ar ga dja gar memã katàt ar amijo aban adjukapri. Katàt

ar amijo aba: nhym kam Kritu arÿm bôx. Bôx nhym me arÿm amiman Metîndjwÿnhmã kum,

—Mrãmri amexkumrêx. Me kute amim amarja katàt ar amijo ban ukaprî. Ba kam gadjwÿ amex ma. Mrãmri amexkumrêx, ane. Dja me ar akatàt pumÿn arÿm ã Metîndjwÿnhmã ane.

Me kute me bënjadjwÿr kabën marmã.

Rô 13.1; Xit 3.1

¹³ Ba ar amã arê gar ama. Dja gar pykakam me bënjadjwÿr kabën kunî ma. Mÿkam? Bir, gar arÿm kàjkwakam anhõ Bënjadjwÿr djwÿnh kabën maro aba. Ta ne arÿm ar amã me'ã karõn ar amã,

—Pykakam ar anhõ bënjadjwÿr kabën ma, ane. Kute ar amã anhÿrkam ar aje pykakam anhõ bënjadjwÿrdjwÿ kabën marmã. Bënjadjwÿr raxo kute me bënjadjwÿr kunî jakrenhja dja gar kabën ma. ¹⁴ Nàr me bënjadjwÿr kute atãri ar amã ÿr ja dja gar kabën ma.

Metîndjwÿnh ta ne ar amã me bënjadjwÿr jano. Ta ne ar amã aje me kabën marmã arê. Mÿj kadjy ne ar amã me arê? Bir, dja me bënjadjwÿr me axweo bikënho ba. Nàr, dja me katàt kute amijo bajamã mex jarënho ba. Me kute ã meo anhÿr kadjy ne ar amã me bënjadjwÿr jarê. Kam, dja gar me bënjadjwÿr kabën man katàt ar amijo aba. ¹⁵ Katàt ar amijo aba nhym kam me kwÿ ar ajã kabën kajgo kumex jarê. Me bën kati dja me ã ar ajã ane. Kwãrik wãnh rã'ã. Ar ga dja gar arek katàt ar amijo aban 'ã adjukanga kêt. Nhym kam amÿ me krãptî arÿm ar amexkôt ar apumÿn arÿm me kabën kajgoja mar kêt. Nhym kam me arÿm anhikrën arek dja. Dja gar aje katàt amijo abao ã me kabën kajgoja nhityo ane. Metîndjwÿnh kute ar amã 'ã karõ kôt dja gar ã ane.

¹⁶ Amrêbê ne gar te ajaxwe kêtã ne ajaxwe rã'ã. Jakam ne Kritu arÿm ar ajaxwebê ar apytàn arÿm ar amã tÿx jangij. Ar ajaxwebê ar atÿxkam ar ga ne gar arek mekôt ar

aban adjumar mex. Arek mekôt ar abakam kwârîk wānh arîk ar aba kêt. Ga, me kwỳ kute,

—Ba ne ba arek mekôt ar iban idjumar mex, anhÿrja pumũ. Nām me anen kam arîk ar ban axwe:. Ne kam me kute mrāmri ne me kute kubêkà mex jangjênh ne kadjwÿnhbê punu rã'ã pyrāk. Kwârîk wānh ã amijo anhÿr kêt. Ar ga dja gar abê Metîndjwÿnh nhõ àpênhkumrêx ne kum adjàpênh tÿx ne katàt kabên man kôt ar amijo aba.

¹⁷ Me kunĩ ar aje kàjmã memã rax kamênh kadjy dja gar amima. Jeju kukwakam ar aje meo akamyja ar amã me abê. Amã Metîndjwÿnh rax pyman bēnjadjwÿr raxja kàjmã kum rax kamẽ.

¹⁸ Me kute ar ajõ ar apa 'amÿnh gar memã adjàpênh kajgo ar aba ar, ar amã ne ba ikabên jarẽ. Dja gar akrānmã pykakam ar ajo ba djwÿnhmã adjàpênh katàt ne rax ma. Djām ar ajo ba djwÿnh mex ne kabôt katikambit dja gar kabên kôt kum adjàpênh katàt? Kati. Àkrê prāmcamdjwÿ kum adjàpênh katàt.

¹⁹ Mÿj dja gar nēn kam arÿm Metîndjwÿnh kīnh nhym ar amã mex jarẽ? Bir, dja gar katàt Metîndjwÿnh kabên man kôt ar amijo aba. Nhym kôt me arÿm ar ajo ajkẽ gar kôt arÿm atokry ne akaprĩ ma. Kam dja gar Metîndjwÿnh kīnh nhym arÿm ar amã mex jarẽ.

²⁰ Godja gar ajaxwe nhym me pānh ar ajo bikēnh jabej gar kam akrānmã amitokry mar jabej. Djām kam gar arÿm Metîndjwÿnh kīnh nhym kute ar amã mex jarēnhmã? Kati. Nhym be, godja gar katàt ar amijo aba nhym me arÿm kôt ar ajo bikēnh jabej gar kam akrānmã atokry mar jabej. Katàt ar aje amijo abakambit dja gar arÿm Metîndjwÿnh kīnh nhym ar amã amex jarẽ. ²¹ Katàt ar aje amijo abakôt me kute ar ajo bikēnh gar kôt atokry. Ja kadjy ne Metîndjwÿnh amiwÿr ar ajuw ne ar ajo ba. Ga, Kritudjwÿ gwaj bakadjy tokryja pumũ. Gwaj baje kudjwa

katàt amijo baban kôt batokry kadjy ne gwaj bakadjy tokry.

²² “Djã nãm Kritu axwe? Kati. Djã nãm memã 'êx ne me noo akno? Kati.”*

²³ Me kum àkjêrkam djã nãm amipãnh memã akij? Kati. Tokrykam djã nãm me kangrô? Kati. Nãm Metĩndjwỳnhmã amijarê. Kute katàt memã axwe pãnh jarênh djwỳnhkumrêx jamã ne amijarê. ²⁴ Kritu ta ne pĩte'ykam gwaj bajaxweo pãnh. Mỳj kadjy ne gwaj bajaxweo pãnh? Bir, gwaj bamã bajaxwe prãm kêt kadjy.

Ga, me tyk kum axwe prãm kêtja pumũ. Gwaj badjwỳ arỳm batykmãn pràbê bamã bajaxwe prãm kêt ne ar baban baje kabên marn kôt baje amijo baba prãm. Ja kadjy ne arỳm gwaj bajaxweo pãnh. Mry kà punuo ne me prĩne ôm nhym kam Metĩndjwỳnh arỳm kôt gwaj bajo mex gwaj kam ã bamã bajaxwe prãm kêtto ane. ²⁵ Ga, mryo ba djwỳnh kêtka mrykĩ'ãtomti arỳm no biknor ne ate ar baja pumũ. Ar gadjwỳ ne gar ate ar aba. Nhym be, jakam gar arỳm ajo ba djwỳnh Jeju'y'r amijo akêx ne kôt ar amijo aba nhym arỳm ar apytàro ba.

3

Kute prômê mjênãm abenã karô.

Xit 2.2; Xim k 2.9, 3.11

¹ Ê, ar apa, arỳm ar amjênwã, ar amã ne ba ikabên ne. Dja gar akrànmã amjên kabên maro aba. Ar ajô amjên kute amim Metĩndjwỳnh kabên mar prãm kêt jabej ga dja ga katàt kabên kôt ar amijo aban ĩ arỳm 'yr o akêx ne. ² Godja te amim Metĩndjwỳnh kabên mar kêt ne arỳm apumũ. Katàt aje amijo aban amã Metĩndjwỳnh rax pymakôt arỳm

* ^{2:22} Amrêbê ne Metĩndjwỳnh kukwakam kabên jarênh djwỳnhbê Idjaij ja jarê nhym kam Pedru kôt arê.

apumũ. Ne kam amex kôt arÿm Metĩndjwÿnh'ÿr amijo akêx ne tu amim markumrêx.

³ Be, mÿj dja ga amexkam akute nhym me kum akĩnh ne? Djãm akunhêrkam nàr djãm akĩ prĩne mex nàr djãm apÿnh anhõ kên karÿrkam nàr djãm aje akà mex jangjênhkam? Djãm akunhêr jabit ne arÿm kôt amex? Kati.

⁴ Bir, mÿj dja ga ga amexkam akute nhym me kum akĩnh ne? Bir, dja ga anhõkre kadjwÿnhbê akabên mexbit man memã aprĩren akrànãmã memã abên rereko aba nhym me arÿm kum akĩnhkumrêx. Nhym kam Metĩndjwÿnhdjwÿ kum akĩ:nhkumrêx kute mrãmri ne me kum õ mÿjja pãnh ra:x kĩnh pyrãk.

⁵ Amrêbê ne me bakukãmãre nire kwÿ mextiren axwe kêt ne ar ba. Ne Metĩndjwÿnh kanàrrãm ar ban arÿm kabên mexbit jarên akrànãmã mjên kabên maro ba. ⁶ Ga, Xara kute Abraão kabên marja pumũ. Nãm katàt kôt ar amijo ban kum rax jarênh ar o ba. Ar aje Xara tàmdjwÿ pyrãk dja gar kudjwa amjên kabên man arÿm atĩn prãm kêt.

⁷ Ë, ar apa, arÿm ar aprõwã, ar amãdjwÿ ne ba ikabên ne. Kwãrĩk wãnh amidjwÿnhbit maro aba kêt ne prĩne amim aprõ maro aba. Ajitÿxo aje aprõ jakrenhkam kum aprĩ:ren amã abê. Djãm amã aprõ jabê kêt nhym Metĩndjwÿnh kute amarmã? Aje kum amijo adjà'wÿr nhym kute amarmã? Kati. Dja ga amã abê kêt nhym Metĩndjwÿnh arÿm amar kêt. Nhym be dja ga amã aprõ jabê nhym arÿm akabên ma. Djãm apydji ne Metĩndjwÿnhkôt atĩn ne ar abamã? Kati. Metĩndjwÿnh djukaprĩkôt ne ga aprõmê kôt ar atĩn ne ar abamã.

Me kute katàt amijo bamã.

Ep 4.1; Kor 1.10; Tex k 4.1; Ped k 2.12

⁸ Jakam ne ba ar akunĩmã ikabên. Gora ar akunĩ axikôt abenmã akabên jarê. Kwãrĩk wãnh amidjwýnhbit maro aba kêt. Dja gar aben maro aba. Kute me kamy kum kamy jabê pyrãk dja gar ã amã aben jabêo ane. Ar amã aben kaprĩn amijo angrin akatãm ne ar abeno aba.

⁹ Kwãrĩk wãnh me'õ ar ajo ajkê gar amipãnh o abikênh kêt. Nàr, kwãrĩk wãnh me'õ ar amã akij gar amipãnh kum adjãkjêr kêt. Ate dja gar kum akabên mex jarên o djuw mex. Ar aje ã abenmã anhÿr kadjy ne Metĩndjwýnh amiwÿr ar ajuw ne ar ajo ba. Ja dja gar aman ikabên kôt amijo ane nhym Metĩndjwýnh ï arÿm ar amã akĩnh djã ngãn ar ajo djuw mex. ¹⁰ Amrêbê: ne me bakukãmãre memã kum,

“Ar adjumar mex ne atĩn 'iryne ar abamã djãm ar amã ja kĩnh? Mÿj dja gar kadjy amijon?

Bir, kwãrĩk wãnh akabên punu'õ jarênh kêt. Aje me noo abiknor kadjy, kwãrĩk wãnh memã ajêx kêt.

¹¹ Godja me arĩk ar ban axwe on memã akàx. Ar ga dja gar ajaxwe kêt ne amã me kaprĩ.

Ar akunĩ abenkam adjumar mex kadjy dja gar aben nêje aben jakren akabôt katin ar aba ne 'ã adjukanga kêt.

¹² Mÿkam dja gar abenkam adjumar mex? Bir, Bênjadjwÿr djwýnh kute katat me kute amijo baja pumũnh.

Ne kam me kute kum amijo à'wÿrkam arÿm kute me kabên marn kam kute me kabên kôt memã ipêx.

Nhym be, me axweja ne Metĩndjwýnh arÿm mekam no kà nhàn ngryk ne arÿm mebê aptã”, ane.

Me kute amrêbê: me bakukãmãremã anhÿrkam dja gar ã amexo ane.

¹³ Ar amex prãm kam djãm me kute ar ajo bikênh prãm? Kati. ¹⁴ Nàr gar katat ar amijo aba nhym me kôt ar ajo bikênh jabej gar arÿm atokry. Atokry japôkmã akĩnh.

Akĩnh ja dja gar ama. Kwãrĩk wãnh kam ar amã me uma kêt ne atĩn prãm kêt.

¹⁵ Ne ate Bẽnjadjwÿr djwÿnh, Metĩndjwÿnh ma. Ne mexo umatija ma. Ne ano tÿx. Amikôt aje memã amijarênh kadjy ano tÿx. Dja me abej akukij ne amã,

—Mÿj ne ga aman arÿm, “Dja ba Metĩndjwÿnh kôt itĩn ne ar iba rã'ã: rã'ã ne”, anhÿro aba? Mÿj ne ga ama? ane. Dja me ã abej akukjêro ane ga kam amikôt memã amijarên memã kum,

—Kritu ikadjy ty. Ba arÿm tu amim markumrêx. Kam dja ba Metĩndjwÿnh kôt itĩn ne ar iba rã'ã: rã'ã ne, ane. Kwãrĩk wãnh memã bêx kêt. Metĩndjwÿnh mexo uma dja gar aman memã aprĩren memã amijarê.

¹⁶ Dja gar katàt ar amijo aban amikam ajaxwe'õ mar kêt nhym me arÿm ar ajã 'êx ne memã kum,

—Djãm tãmwã katàt kute amijo ba got? Kati, axwe, anhÿro ba. Kwãrĩk wãnh rã'ã. Dja te me ar ajã anhÿro ba, ar ga dja gar katàt amijo aba rã'ã. Ne katàt amijo aba tãmtã: nhym kam me arÿm ar akatàtkumrêx kôt ar apumũn arÿm amikam pijàm ne. Me amikam pijàmmã dja gar katàt amijo ar aba rã'ã.

¹⁷ Mÿkam ne me ar ajã kabên punu? Bir, godja Metĩndjwÿnh ar atokry'ã amim karõ jabej. Kute ar ajã amim karõ kôt ne me ar ajã kabên punu gar arÿm atokry. Ajaxwe kêt ne atokry. Ne te atokry ne Metĩndjwÿnhmãbit amexkumrêx. Nhym be, me kwÿ axwekumrêx nhym Metĩndjwÿnh arÿm memã axwe jarê nhym me arÿm tokry:. Nhym be, ga te ajaxwe kêt ne atokry, ja ne mex.

¹⁸ Be ga, Kritudjwÿ tokryja pumũ. Gwaj bajaxwekôt tokry. Gwaj bajaxwekumrêx nhym ta axwe kêtumrêx ne arÿm gwaj bajaxwe pãnh tokry. Kute Metĩndjwÿnh'ÿr gwaj bajo akêx kadjy tokry. Nãm me kubĩ. Kritu

nhĩkumrêx nhym me kubĩ. Nhym kam Metĩndjwỳnh Karõ akubyn o tĩn ne.

¹⁹ Amrêbê: Nõwe me bakukãmãremê ro'ã ar bakam ne ngõ me imex nhym me arỳm ty. Nhym kam Metĩndjwỳnh arỳm me karõbê ijê. Me tĩn ne ar bari ne Metĩndjwỳnh arỳm Nõwemã Karõ jano nhym arỳm kum arê. Kum arê nhym kuman arỳm kàj bê me akren memã kum,

—Ar ajaxwe:. On wãnh ajaxwemã anhire. Nãm ã memã anhỹro ba. Kute kà raxo ãmri ne ã memã anhỹro ba.

²⁰ Nõwe te memã ane nhym me axwe rã'ã ne. Nhym kam Metĩndjwỳnh ngryk tõ:n te me kute amijaxwe krã'ymã kam ama:. Nhym kam ngõ arỳm me imex nhym me arỳm ty. Nhym kam Metĩndjwỳnh arỳm me karõbê ijê. Nhym be, me ngrêrebit arỳm amim kabên ma. Ar kubê ðbit arỳm amim kabên man arỳm wãnh axwemã ire. Ne kam arỳm kãmã wadjàn kam tyk kêt. Ga, ar kute amim Metĩndjwỳnh mar ne arỳm kàkam yrja pumũ. Kam Metĩndjwỳnh arỳm ngõkam ar utàn ar aro ba.

²¹ Gwaj badjwỳ ne gwaj tu amim Kritu markumrêx nhym me arỳm ngõmã gwaj bajangij. Mỳj'ã ne ngõ kurũm bajapõxja amijakre? Bir, Jejumê ro'ã akubyn batĩn'ã ne amijakre. Gwaj Jejumê ro'ã akubyn batĩnkam ne gwaj arỳm Jejukõt katàt ar amijo baba. Djãm mỳjja punu'õ gwaj banhĩ'ã atom nhym me gwaj bajã ku'õ? Kati Gwaj katàt ar amijo baban arỳm amim,

—Metĩndjwỳnh ne katàt ije amijo ibakõt kute imar, anen arỳm bakĩnhkumrêx ne. Ja'ã ne ngõ kurũm bajapõxja amijakre.

²² Mrãmri ne Jeju akubyn tĩn kàjkwamã wabin arỳm Metĩndjwỳnh djubõk'ãnh nhỹ. Bẽnjadjwỳr rax ne memã nhỹ ne kute raxo, umao mỳjja kunĩ, me kunĩ jakrenh. Kute kadjy mrãnh djwỳnhmê me bẽnjadjwỳrmê me 'ityx kunĩ jakrenh mex ne kabêno me anoro nhỹ.

4

Me kute katàt Metĩndjwỳnh kabẽn kôt amijo ba'ã kute memã karõ.

Ep 4.17; Kor 3.5

¹ Kritu nhĩkumrêx ne arỳm gwaj bapãnh tokry. Ar aje ja markam dja gar amikukãm mã amim,

—Badjwỳ dja ba kudjwa itokry, ane. Dja gar ã amim ane. Mỳkam? Bir, dja gwaj kudjwa batokryn arỳm amim Metĩndjwỳnh mar tỳx ne kam arỳm bajaxwe prãm kêt-kumrêx ² ne bamã mỳjja punu kĩnh kêt. Djãm me axwe kôt dja gwaj amidjwỳnhbito kĩnh kadjy amima, bamã mỳjja punu kĩnh kadjy amima? Kati:. Arỳm Kritu kudjwa batokrykam dja gwaj Metĩndjwỳnh kabẽn man kôt amijo baba kadjy amima.

³ Amrêbê me kute Metĩndjwỳnh mar kêtja kôt gar amijo aban aprõ djwỳnh kupa'ã nàr amjên djwỳnh kupa'ã akurẽ aba. Ne amã mỳjja punu kĩnh. Ne kadjwati kangôkam* ajajbã. Ne me torkam abixaêr punu. Ne kadjwati kangôkam aben tỳx jabej. Ne mỳjjao metĩndjwỳnh karõ nhipêxmã amijarênhõ aba. Ja ne punu:re. Nhym Metĩndjwỳnh ar akam ngryk. Gar kam arỳm Metĩndjwỳnh'ỳr amijo akêx ne tu amim markumrêx.

⁴ Nhym kam me amakkre kêt arỳm ar ajã kabê:n. Me kute axweo ba tỳx rã'akam ar ajã kabẽn ne. Me abenmã kum,

—Je tô, mỳkam ne me arỳm gwaj bakôt bixaêr kêt? anen kam arĩk abenmã kum,

—Nãm gwaj ba kôt ar ba kêt. Axwe. Nãm me ã abenmã ar ajã ane.

* ^{4:3} Mỳjja me kute o kôm ne kôt bibãnh kunĩja, kadjwati kangômê uba kangômê, mỳjja kangô kunĩ ne me kum kadjwati kangô jarê.

⁵ Me wã dja me ĩ prĩne amijaxwe kôt Metĩndjwỳnhmã amijarẽ nhym arỳm memã axwe pãnh jarẽ. Kute memã axwe pãnh jarẽnh kadjy arỳm memã dja. Me tĩnmẽ me tykmẽ arỳm memã dja. ⁶ Ę, me arỳm tykja me tĩnri ne me memã Kritu'ã ajarẽ. Mỳj kadjy? Bir, me tĩnri, pykakam ar bari kute amijaxwe mar ne kam arỳm tykkam Metĩndjwỳnhkôt tĩn ne ar ba kadjy ne me memã arẽ.

⁷ Me kunĩ kute aminhinomã amimẽnh djà nhõ akati bõx 'ỳr. Kam dja gar akrã mex kadjy amiman ajaxwe kêt kadjy amijãno djan kum akabẽno aba.

⁸ Ar aje Metĩndjwỳnhmã akabẽnkam amex. Nhym be, ar amã aben jabẽkam gar arỳm ar amexo amũ amikamẽn arỳm ar amexti:re. Kam ar amã aben jabê:. Dja gar amã aben jabẽn arỳm aben jaxwe krãptĩo aknon mar kêt ne.

⁹ Dja gar abenmã anhũrkwã jarẽn abenkam aku. Kwãrik wãnh aben kãxã ar anhõ mỳjja'ã maje amim,

—Mỳj kadjy dja ba kum inhõ mỳjja jarẽ? anhỹr kêt.

¹⁰⁻¹¹ Metĩndjwỳnh Karõ ne ar amã adjãpẽnh djà'ã karõ. Apỳnh ar anhĩ djari ar amã 'ã karõ gar apỳnh adjãpẽnh djà maro aba.

Ar ajõ aje memã kabẽn jarẽnh'ã kute ar amã karõja, Metĩndjwỳnh kabẽnkumrëx dja gar memã arẽ. Kwãrik wãnh memã kabẽn kajgo'õ jarẽnh kêt.

Ne ajte kute ar ajõmã aje meo djuw mex'ã karõja dja gar memã mỳjja nhõro aba ne me kadjy adjãpẽnhkumrëx. Aje meo djuw mex kadjy Metĩndjwỳnh arỳm ar amã tỳx jadjã. Dja gar arerek kêt ne meo djuw mexo aba. Metĩndjwỳnh ne ukaprĩ:kumrëx. Ar gadjwỳ dja gar adjukaprĩkumrëx ne ar adjãpẽnh djà'ã adjukanga kêt ne memã adjãpẽnh ar aba. Memã adjãpẽnh kunĩkôt dja me arỳm Metĩndjwỳnhmã mextire jarẽ. Ne kum,

—Ga ne ga adjukaprĩ:kumrëx. Akabẽnkôt ne Jeju Kritu bõx. Ba arỳm tu amim markumrëx, ane. Metĩndjwỳnh ne

ra:x ne kute me kunïo ba djwÿnh. Rax rã'ã: rã'ã ne. Ne ren me kunï kum rax jarê. Mrãmri. Tãm ne ja.

Me kum me kute amim Kritu marja kurê.

Mat 10.16; Dju r 16.1; Pir 1.29; Idja 12.3

¹² Akmere, àpnhire ar, ba ar amã arê gar ama. Ga, me kute kuwykam kën karÿr jadjwÿrja pumû. Me adjuw nhym ôr ne xêr nhym mÿjja punu kunï apôx. Ar gadjwÿ dja ar akaprï dja ar ajo ba gar atokry: ne. Birãm ar amãbit ne kute me kute amim Jeju marja tokry prãm kêt pyræk. Gar kam amim,

—Je tô ba ne ba ije amim Jeju maro iba nhym itokry ja ijo ba. Mÿkam? ane. Kwãrik wãnh amim ja jarênh kêt. ¹³ Be ga, Kritu tokryja pumû. Me kute amim Kritu mar krãptidjwÿ kôt tokry. Ar gadjwÿ dja gar kôt atokry. Kwãrik wãnh kam akaprï kêt. Dja Kritu me:xkumrêx ne uma:n arÿm bôx. Godja jakam kôt atokry jabej dja gar bôxkam akïnhiti:rekumrêx.

¹⁴ Ar aje amim Kritu mar nhym me arÿm kam kum ar akurê. Djãm kam ar akaprï got? Ga, Metïndjwÿnh Karõ ar amê amijo kajkepja pumû. Karõ ra:xkumrêx ar amê amijo kajkep. Kam te me kum ar akurê gar akïnhkumrêx. Me ta ne me Kritu'ã kabên punu. Nhym be, ar ga ne gar kum nextire jarê.

¹⁵ Nhym be, dja ar ajõ aje me par nhym me kôt ajo ajkê ga atokry. Nàr, adjäkïnhï nhym me kôt ajo ajkê ga atokry. Nàr aje amim me kukjêr prãm nhym me kute amã amijarênh ga aje amû memã me arênh prãm. Nhym me arÿm kôt ajo ajkê ga atokry. Nàr ajaxwe 'õ nhym me kôt ajo ajkê ga atokry. Djãm kam akïnh? Kati. Ajaxwekam akaprïkumrêx. Kwãrik wãnh ã amijo anhÿr kêt.

¹⁶ Nhym be, aje mrãmri amim Kritu markumrêx nhym me arÿm kôt ajo ajkê ga atokry. Kwãrik wãnh kam apijãm kêt. Dja ga kam Metïndjwÿnhmã rax jarênh kum,

—Djünwã, ije amim Kritu markam ne me ijo ajkê ba itokry. Ba kam ikĩnhkumrêx, ane.

¹⁷ Apÿnh gwaj baje marja Metĩndjwÿnh kute gwaj bajaxwe jabej amim gwaj bakukjêrmã. Õ akati gwaj bawÿr bôx 'ÿr. Gwaj bajo dja amim me kukjêrmo krax. Gwaj bajo kute memo kraxkam mÿj dja ï arÿm me amakkre kêt kam nê? Bir, dja me axwe jabej amim me kukij nhym me arÿm amijaxwe kôt kum amijarê. Nhym kam arÿm memã pãnh rax jarê. Me kute Kritu'ã ujarênh ny mar kêt pãnh tokry rax jarê. ¹⁸ Amrêbê: ne me bakukãmãre ije ar amã arênhja kôt memã kum, “Metĩndjwÿnh kute me katàt kute amijo baja pytàr ne tô, kam àpênh rax.

Nhym kam mã dja me axwemê me kute Metĩndjwÿnhbê amijo akêxja mekam nê?

Bir, mrãmri dja memã pãnh jarê nhym me axwe pãnh tokrykumrêx.”

Nãm me bakukãmãre ã memã ane.

¹⁹ Tãm ne ja. Metĩndjwÿnh kute ar ajã amim karõ kôt dja gar katàt ar amijo aban ajmã akute kêt ne ar aba. Ne te katàt amijo aban arÿm atokry jabej. Kum amijarê gê ta ar atokrykam ar apytã. Metĩndjwÿnh kute ar anhipêx djwÿnh kute ar amarkumrêx ne ar ajã ukanga kêt kumrêx. Kum amijarê gê ta ar ajo ba.

5

Kute meo ba djwÿnhmã àpênh'ã karõ.

¹ Ar akam ar abê Jeju nhõ me jao aba djwÿnhwã ba ar amã ikabên jarên ar adjàpênh djà'ã ar amã karõ. Dja gar ikabên ma. Ota, badjwÿ ibê Jeju nhõ me jao iba djwÿnh. Ba ne ba Kritu tokrykôt omũ. Dja ba ajte omũ. Djãm rerekren kajgo ba omũ? Kati. Dja ra:x ne uma: ba arÿm omũn kôt ar iba.

² Ga, me kute me ò krito djuw mex nhym memã abatan-hja pumũ. Ar gadjwỳ dja gar wãkam me kute amim Jeju marmã arẽho aba. Memã Metĩndjwỳnh kabẽn jarẽho aba gẽ me mar mexo amũ amikamẽn mar rax ne. Djãm me'õ ne kute ar amã ar aje meo aba'ã àpnẽn tỳx gar amã uman kabẽn kõt ar aje me omũnho abamã? Kati. Ar ga dja gar amã me omũnh kĩnh ne meo aba. Djãm ar aje pi'òk kapribit mar ne aje amim o adjaptar kadjy meo abamã? Kati. Ar amã me kĩnhkam dja gar me o aba. ³ Djãm ar aje amiraxo adjamran Metĩndjwỳnh nhõ me ja janoro abamã? Kati.

Ga, mrykĩ'ãtomtio ba djwỳnh ò krit kukãm katat baja pumũ. Katat ba nhym ò krit arỳm kõt katat amijo ba. Ar gadjwỳ dja gar Metĩndjwỳnh nhõ me ja kukãm katat ar amijo aba gẽ me ajã amim, “Ba gêt kudjwa”, anen arỳm ar akudjwa katat ar amijo ba.

⁴ Ga, me kute aben rer djaja pumũ. Kam me'õ kute me kunĩ rerja dja kĩnh djã'ã arỳm amim krãdjẽ byn kutu. Pi'õo krãdjẽ tu. Nhym kam pi'õo krãdjẽ tẽmbẽ punu. Ar gadjwỳ dja gar katat ò me ja kukãm amijo aba mex ne arỳm amim akĩnh djã by. Ò me jao ba djwỳnh djwỳnh dja bõx. Jeju dja bõx ne arỳm ar amã ar akĩnh djã mexti:re ngã gar arỳm amim aby. Djãm ar akĩnh djã rerekmã? Djãm punumã? Arkati. Kute ar amã ar akĩnh djã nhõr ja dja mex rã'ã: rã'ã ne.

⁵ Ar ababatanh nyredjwỳ, ba ar amã ikabẽn jarẽ. Dja gar mebêngêt kabẽn ma. Arỳm me abatanhkam dja gar me kabẽn man kõt ar amijo aban amim,

—Djãm ije iraxo me akrenh? Kati. Ikajgo, anen abenmã amijo angrin akajgo. Mỳkam? Bir, amrêbê: me bakukãmãre memã kum,

“Me amijo àmra prãmja Metĩndjwỳnh arỳm mebê aptà.

Nhym be, me kute amijo kajgo dja Metĩndjwỳnh tu mekam ukapřikumrêx”, ane.

⁶ Metĩndjwỳnh 'ityxo kubê kumkati dja gar rax man kam arỳm amijo akajgo. Amijo akajgo: nhym ĩ akati 'òkam arỳm kàjmã ar akaměn ar ajo rax ne. ⁷ Dja gar rax ma:n kum ar adjumar punu djã kunĩ jarēnho aba. Kute ar amar ne ar ajo djuw mexo ỳrkam ã kum anhyro abao ane.

⁸ Ar ano mex ne amijã ano tỳx ne aminėje rīt. Ga, rop jamrexe kàr ar baja pumũ. Nãm kute mry'ò krēnmã abej ar ba. Akurê djwỳnhbê Xatanajdjwỳ ne 'ity:x ne àkrê: ne kaběn 'ity:x ne me abej ar ba. Kute me'òbê Jeju kurēmã nhym 'ã ukangamã ne abej ar ba. ⁹ Dja gar tu amim Metĩndjwỳnh mar tỳxkumrêx ne 'ã adjukanga kêt ne o arỳm Xatanajbê aptàn arek kubê dja. Xatanaj ar abê Jeju kurê prãm ne ajte pyka kunĩkôt me bakamydjwỳbê kurê prãm. Jeju kukwakam ar aje meo akamyjabê kurê prãm nhym me ar akudjwa arỳm tokry. Ja dja gar aman kubê aptã.

¹⁰ Metĩndjwỳnh ta ne tu kum me kapři:kumrêx* ne přine kute me kunĩo djuw me:xkumrêx. Ta ne Kritu djãpēnhkôt amiwỳr ar ajuw ne ar ajo ba. Dja gar ò kàjkwakam kôt atĩn ne ar aba rã'ã: rã'ã ne. Ja kadjy ne amiwỳr ar ajuw. Be, ar atokry kàjbê 'irykam dja přine ar ajo mex. Ta dja akubyn ar amã tỳx jadjà gar kôt adjãm tỳx ne 'ã ar adjukanga kêtumrêx. ¹¹ Gê me kunĩ kum mex jarēnh rã'ã: rã'ã ne. Gê me kunĩmã rax rã'ã: rã'ã ne. Tãm ne ja.

¹² Ije ar amã ikaběn jarēnh ja ne ba Xibanumã arē nhym arỳm 'ã pi'òk no'òk gar arỳm amim arē. Me bakamybê Xibanu ne tu amim Jeju markumrêx ne 'ã

* 5:10 Djãm me ba ne gu me badjukapřĩ nhym pãnh kum me bakapřĩ Kati. Me ba ne gu me badjukapřĩ kêt. Ta ne kum me bakapřikumrêx.

ukanga kêtikumrêx. Ba ar amã ikabên jarênh 'ikrân nhym 'ã pi'ôk no'ôk ne. Ar akînhmã ne ba ar amã arê. Ba ar amã mrãmri Metîndjwýnh ta tu kum ar akaprîikumrêx jarê. Kam dja gar tu amim markumrêx ne 'ã adjukanga kêtikumrêx.

¹³ Krîraxbê Babirônijkam me kute amim Jeju mar ne ar aben pydjio baja ne me ar amã kabên mex jarê. Metîndjwýnh kute meo ba kadjy arým amijo me utà. Ar gadjwý arým amijo ar apytà. Makôdjwý ar amã kabên mex jarê. Tãm ne mã ikôt ajkamên arým kute ikra pyràk.

¹⁴ Dja gar abenwýr bôx ne abenmã akabên mex jarên aben pa krij. Ar amã aben jabêkam aben pa krijn aben tatak ne.

Gê ar aje amim Kritu Jeju mar kunîwã umar mex. Tãm ne ja.

Metĩndjwỳnh Kute Memã Kabẽ Ny Jarẽnh
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27
